

摛藻堂四庫全書薈要

集部

欽定四庫全書叢要

集部

懷麓堂集卷八十九

詳稽官候補通政司經歷臣郭祚熾

欽定四庫全書會要卷一萬六千七百十八

集部

懷麓堂集卷八十九

明 李東陽 撰

後稿二十九

誌銘



明故通議大夫吏部左侍郎兼翰林院學士掌

詹事府事張公墓誌銘

嗟乎東白公已矣公姓張氏東白其所自號竟以號行

天下皆知有張東白者而今已矣嗟乎公五歲精爽過人書過目成誦其父松亭翁名之曰文魁寧靖王召見令作儼對韻語大加賞歎書元徵二字賜之因易名元徵松亭攜入閩觀者塞道公至考亭拜朱晦翁遺像輒有志所謂道學者松亭謂曰彼儒先曷嘗不由科舉進邪乃入南昌縣學爲生都御史韓公雍奇之曰此人瑞也復易其名曰元祐字之曰廷祥天順己卯舉鄉貢庚辰試禮部得詩魁英宗每掄材必兼贊幹公貌癯然若

不勝衣李文達公特簡為翰林庶吉士劉文安公奉詔
授業見其文斐然以驚壬午授編修考校精覈歲貢士
鮮入格者癸未同考禮部得太倉陸武為省元人始未
信後果有大名憲宗即阼上疏請行三年喪復言講學
聽治用人厚俗四事預修實錄書法不苟時同官多不合
者成化丁亥謝病歸示無復仕進意名益重從之遊
者四達而至藩臬郡縣至者未始不往見見則慚然自
失諸言事者累薦起之不果居二十年值孝宗即位弘

治戊申召修實錄至則以舊勞遷春坊左贊善上勸行
王道疏幾萬言入侍經筵己酉考南畿鄉貢辛亥書成
遷南京翰林侍講學士癸亥念母老復謝病歸越五年
戊午召修大明會典為副總裁至復遷翰林學士掌院
事孝宗隆其名特置日講兼侍東宮講讀數月以母憂
去壬戌擢南京太常寺卿癸亥召修歷代通鑑纂要改
太常卿仍兼學士侍日講甲子命掌詹事府事乙丑考
會試即奉詔授吉士業一日忽上疏請講太極圖西銘

諸書上亟索內閣得之蓋有意大用未幾而龍馭上賓矣今天子繼統以侍從恩擢吏部左侍郎仍兼學士加從二品俸勅為實錄副總裁自是數病病必連月屢上疏乞致仕優詔弗許正德丁卯滿三載未奏十二月晦日卒公少侍父疾願天請代喪禮尚古事母色養惟赴召時不及躬斂憾之終身遇二弟有恩嘗建一莊歲置租二百石以濟族鄰以四百石貸鄉民有司為給帖書籍其於書務博涉尤好探經傳蹟隱多所獨得一時談

理學者數人各樹門戶而公岸然不為下作易詩春秋語要四書集要太極圖說要綱目近思錄家語解要皆未脫稿為詩文始務奇崛勇脫蹊徑晚就平實若出二手然類為人所重莫為軒輊論議揭揭尤深嫉惡至不可近及再入宦途益寬厚雖後生寒士亦與抗禮顧或為貶抑要其中容有所見賢者之不可測固如此天每艱於生才才者未必用有如公者豈易得哉豈易得哉公生於正統丁巳某月日年七十乃卒其子諳予請銘公亦豈易銘哉銘曰

木生在山久乃益堅輦致於途蹶萬牛以顙貢之明堂
將棟將梁忽內蠹以傷孰其生之而卒棄厥良人材實
殊公負其有惟厥攸負曰可與大受與不在天受不在
予夫苟不自愧遑卹其餘惟文之絕維名之揭彼利達
者疇巧疇拙地靈人傑維鄉邦之哲百世之下山不泐
水不齧茲惟張東白公之穴

明故錦衣衛掌衛事都指揮使贈榮祿大夫右
軍都督府都督同知葉公墓誌銘

公姓葉氏諱廣字大用世錦衣衛為總旗公少孤賴母
范夫人鞠成之俾學書藝既代役識者曰是非行伍中
人領東廠緝訪事詳慎不泄成化八年以功擢試百戶
莅本所事屢奉勅出勘重獄所在餽贐悉辭弗納江西
藩臬賦詩贈之遼東武臣奏其地有金礦珠池公奉命
往勘躬涉境外察其姦事遂寢東人德之至今領本衛
緝訪事事必核有劇盜詔捕甚急或陰跡所在以告公
曰盜固有罪待其自犯爾何得為邇者後自訪得之有

校尉緝越城盜公疑之執不變公曰若殺此人後獲真者柰何不數日真者果獲二十一年實授為百戶明年遷副千戶理鎮撫司刑鞫獄精密有姦婦掣毒假婢手中其夫槩坐死公以婢不知情辯釋之有校尉誣執平民為盜反坐執者都察院守者相仇殺逮繫百餘人戶部進內藏銀數失實繫者亦衆皆止坐罪者其餘平反縱釋多至不可計弘治五年擢署指揮僉事明年本衛缺員兵部薦其名時孝宗簡在已久御文華殿親閱之

命莅衛事實授為僉事總都城溝塗事人不敢犯出勘
寧化王府疑獄務存大體勘大明川投獻地卒歸於民
督捕中外盜賊獲數千百人而鄭村壩賊尤劇數年累
遷都指揮僉事北山賊稱靠山王者勢甚獗方發官軍
出捕比至則公已遣官屬擣其巢滅之一日矣上偉其
功遷都指揮同知又勘外戚莊地及藩府儀賓獄皆集
事而還今皇帝正德元年進都指揮使掌衛事凡郊祀
耕籍視學經筵諸大禮無弗預者減役從省浮費政令

一新官屬皆改視易聽總緝訪事尤極慎重戒諭官校必
以天道國法為說詞議懇切人多感動蓋隱然有陰德焉
八月二十五日卒於正寢距其生正統三年七月二十三
日壽至七十朝廷特贈榮祿大夫右軍都督府都督同知
命禮部諭祭者三工部治凡葬事皆異數也公器局魁碩
敏而能斷遇事不苟動先自律威貸旁午屹然不為動自
壯至老未嘗少易又能體悉羣情不過苛刻用是獲於上
下交口贊譽翕然同辭其卒也尤悼惜不置云銘曰

有偉丈夫奮起朝列在帝左右職掌麾節使旌矛矛出
徧藩臬命不我辱物不我涅嚴嚴詔獄法象斯設鞠明
察幽靡枉弗雪衝飈激濤盤根錯節如穢得濟如觴解
結隨不失正剛不至折功名始終竟保完潔高門截臬
永樹閭閻外有佳城幽光不滅

明故武定侯郭公墓誌銘

郭公存忠自錦衣衛指揮僉事襲封武定侯越七年卒
上輶視朝一日命禮部諭祭者三勅有司治凡葬事皆

如制公之為僉事也嘗試武舉有名然未甚顯會錦衣
闕員兵部以公數人名上孝宗御文華殿親閱之見公
儀觀秀整進對明暢命莅衛事每侍衛扈從必以目屬
焉嘗參預廷鞫總都城溝塗事兼督工修治充殿試執
事官出勘長沙衛獄詞涉藩府歸奏稱旨其為僉也僉
右軍都督府事領京營牧馬勘蘄州牧場地捕北山賊
屬若干人敵寇大同命充右參將尋命簡京營兵別部
以俟公易置旗鼓嚴為肆練勇氣增倍後不果行乃上

邊務六事累數千言都御史陳公道韓御史春交章薦之各極稱譽亦未及試也公雖生故家值業中落囊無餘貲惟積書數千卷凡天官時日戰守攻圍之法悉有指授以至堪輿醫卜罔不究心公暇則詠詩作書開園蒔花尤好竹以賓竹自號大夫士過者談論窮日夕不厭也事母致孝友誼尤篤貧而死者為具棺斂人以是賢之獨其中所蘊蓄弗克大展齋志以沒識者又以是惜之公生景泰甲戌某月某日卒於正德丁卯六月十六日年五十四其葬

則十月三日也子勛奉公治命請予銘銘曰

郭有封國在高皇世一門兩侯侯者再繼仲繼以恩伯
繼以功三紀之後歸於太宗翼翼京營嚴嚴督府既衷
壯猶亦佐耆武維時恬熙兵斂弗耀志在邊疆身則廊
廟謂公既試而有遺才公子公孫繼繼其來附於先公
是謂無忝幽光百世昭不可揜

明故山東萊州府知府進階亞中大夫致仕李

君墓誌銘

君姓李氏諱檠字從質其先望於隴西元季有諱成者居鳳翔國朝永樂中徙河間之任丘考諱溥登陝西鄉薦累官山東東昌府學教授贈儒林郎光祿寺丞生四子君其長也生而凝重不浮儒林公邃易學歷湖蜀秦魯間多所造就因以授君君補縣學生提學間御史禹錫賞所為文試必居首遊從至四十餘輩任丘士多業儒傳易者實自君始成化甲午舉京闈戊戌登進士知上海縣賦訟叢沓持以鎮靜和而不狎每有鞫問人稱

為明以外艱去民遮道攀送有下泣者服闋被徵擢光
祿丞越六年當弘治壬子遷少卿六年戊午擢知萊州
府值歲屢歉撫煦凋瘵理疆界均力役捕割盜六千餘
人時勾稽屯地戎衛欲移患於民或議牧馬於萊又有
獻地於衡藩者皆力爭以免招徠流徙與屬縣期約視
多寡為殿最旬月內復業者至數千人民稍饑輒發粟
施粥活者尤衆暇則修葺學舍集諸生勵以行業萊人
為刻石頌德焉越八年不調君以子時已舉進士為翰

林編修乃上疏乞歸吏部言其恬退可嘉宜進秩以示
勸特陞山東布政司右參政致仕明年得疾就醫京邸
數月歸又明年病劇時亟欲歸省會孝廟實錄告成有
日又朝廷將行黜陟之令君手書止之自制棺斂處分
家務曰無以為吾兒累也時憂甚弗暇他卹亟具疏以
請踰月乃獲命比抵家君已逝七日矣君夙敦孝慕每
見儒官輒加禮遇曰吾父嘗為是也世所遺田宅悉讓
諸弟羣從子女皆為婚嫁處已慎密澹然無所利有治

事才而為寬厚所掩又恥自衒故鮮有知者時亦用家學顯才器甚偉所進未可量歸省事尤汲汲若弗建竟弗躬治命其志尤可哀也自狀父行以墓銘告銘曰

駕於亨衢既蹶復驅弗摧我車颶彼中流倏退以休式完我舟尺蠖之屈冥鴻之揭非我失得彼逐逐者其欲其舍無一非我得不在身有天者存以遺我後人

封孺人彭母李氏墓誌銘

婦職視所從為貴賤然事在兩值或兩值而一貴者蓋

亦有遺寵焉彭母李孺人之封實以大理寺正君諱銓
初命為評事其子縉累官禮部員外郎秩加顯而封號
未及進故仍稱孺人而以先封故不得稱太制也李氏
出襄陽舊族與彭為郡望孺人之父諱濟以國子生為
同安縣丞有惠在人寺正君之父贈評事真朴翁諱某
聞李氏女賢聘以冢婦同安亦耳熟寺正君之材簡於
諸生謂為偉器議是以克合孺人孝敬勤儉皆出天性
服食簡糲而奉祀修饋必豐潔端里窮乏有須輒應俯

接卑幼無不意滿以去內外賢之生縉未彌月出事升
曰手為杵所傷裹以供役翁責羣幼弗代孺人謝曰婦
職固是也寺正君舉鄉貢擢進士第既授官孺人貴不
廢業寺正君嘗賑饑齊魯間蠲逋發陳招集流徙夙夜
不暇給孺人留京邸勤家政內外截截君子以為有內
助焉寺正君還朝道卒孺人哀毀幾不能生既歸葬壹
意教子市織紡為膏火費縉繼舉進士授萊州府推官
孺人實就養每訊獄聲徹屏幃輒為廢食飲縉歸必問

之故往戒之曰汝父之為是物恒自慮獲譴及出脈活人多甚吾知其必有後也汝無亦為後地乎縉被召為兵部武選司主事孺人復至京邸後數年改禮部再命至今官而孺人歸已老不復出矣正德三年戊辰五月八日卒於家壽七十有四子三人縉其長縉予禮部所舉士也勤慎奉職不愧其父其徵銘也甚懇而哀吾是以銘銘曰

得於夫者以成其子優學為仕平反為理復為禮官內

則之軌惟所從故以興終始有藏在茲百世無毀

蕭芝菴墓誌銘

芝菴蕭君來自南實以子昂居京師就養五年乃卒已而厥配潘孺人亦卒昂將歸合葬奉兵部郎中李君源狀請予銘按狀蕭氏本蜀望仕宋居河南從南渡寓於閩國初有伯亨者嘗被召以疾辭不起賜歸錢塘給薪米數十戶終其身是為君祖子敬號善寧居士隱於鄉是為君父君諱鑑字克明芝菴號也生而端慤長益謹

厚寡言笑不喜戲劇遇事輒奮欲自立時家中落晝為
豐幹夜歸誦讀不絕口業寢就裕事親志養婚弟嫁妹
為從子置田宅育諸甥如己子友有黃佐者同貿于外
各市官鹽若干引至桐江黃舟壞鹽盡覆君公所有予
之黃負金為所窘君亦代之償黃謝曰微公佐死久矣
分水縣學生郎啟親寒不能葬君貸以漆山田十畝并
其券折之杭州衛百戶杭華代職京師貧不自活君給
以衣食復資而遣之其他周困振乏者尤衆晚好醫書

得其实奧以疾告者雖天寒暑必赴酬以金幣輒辭曰
吾豈為利計哉鄉人無長少疏戚皆以號稱之曰芝菴
長者也孺人同邑橘泉處士之女有淑質慧敏精女事
能讀列女傳諸書比歸禮佐孝養治內無違則君喪哀
甚忽夢君因大慟幾絕越數日竟不起惟昂一子以名
醫被徵入太醫院供事內局比以進藥功擢御醫命下
君已卒七日而孺人猶及見焉明年庚午三月三十日
合葬於西湖婺井之原故為銘銘曰

蕭出內江始遷洛陽由閩逮杭迺居錢塘其業經書其
術岐黃父教之良矧有義方老家於官全歸其鄉子職
之勤矧惟顯揚龍泉之原山迴水長居也同堂寢也同
藏有存不亡百世勿忘

銘

明故封奉直大夫翰林院侍講學士劉公墓誌

封翰林院侍講學士劉公諱規字應乾舉成化己丑進
士知浙江餘姚縣以父喪闋服改知湖廣麻城縣被簡

為監察御史左遷廣西鬱林州判官孝宗皇帝登極復
敘遷為江西新淦知縣以母老上疏乞歸養例弗許時
其子春已為翰林編修會上兩宮尊號恩當封乃棄職
就封秩為編修階文林郎暨今上皇帝登極復以兩宮
尊號恩進封侍講學士階奉直大夫壽七十三卒正德
三年九月十四日也公性剛介不為物撓在餘姚出納
興革心計力作閩海堤圮亟為修築患里甲苦供役手
自籍記令里日出米二石餘則均於次日日省數倍重

興學士經獎勸者多有名於時每賑饑必審實里戶高
下以次給之民獲實利治獄必先矜恤隨事斷決不輕
械繫而往往得其情狀病勢家請託每客至延坐後廳
令羣吏左右侍皆莫敢出口以去然亦無怨也按察蕭
僉事禎有戚屬出入為需索公械送於蕭蕭謝之遂用
是知公麻城差易治治又加昔故不勞而辦為御史覈
湖廣貴州軍儲又按山東雖擿發姦伏而務平恕每慮
囚獄疑者必從宥法劾叅政張盛為所詮補外未嘗色

悔焉痛蚤失怙事母每飯必躬侍建家祠修世譜周贍
貧族至老不倦蓋其居官不苟得而家積穀粟益饒裕
其為義舉以此尤嚴子教每語之曰居者為孝仕者為
忠又語其仕者曰爾輩各有職職異而理同爾其識之
長子春舉解元進士及第累官至學士賜四品服以學
行聞台亦舉解元進士歷吏部員外郎今為泰州同知
孫鶴年復舉進士彭年舉鄉貢士科第之盛鮮與為比
其次曰松年大年嘉年延年光祖繼祖萬年皆宜人鄧

氏出學士君在講筵史局方嚮用聞訃將歸卜以明年某月某日襄事奉狀請予銘銘曰

邑不我訛臺不我矜旋復棄之封君是稱科以三世教以一經矧有世守有行有名公名固存奚俟茲銘

光祿寺少卿致仕進階朝列大夫李君墓誌銘

去年冬予會抱犢李光祿南屏潘太史遂逸張西臺於家三君者並京產潘張皆予姻家李君亦少同筆硯張氏之好實與成之故也時李君已病歸遂劇越數日手

書抵予若欲為永訣者既又以韻語屬予銘墓比再遣人
候之則已逝矣予既與遂逸會哭春初有事於城南是夕
夢焉乃悲而銘之李氏世居徐之沛縣後徵至京師隸錦
衣衛籍君諱紳字縉卿其自號曰抱犢山人生而朗潤數
歲能屬對人爭誦之嘗與予從監察御史岐山展先生遊
並被甄賞君長予三歲顧淹一舉舉成化乙酉鄉貢連擢
丙戌進士授行人司行人數奉使足跡遍天下聞見益博
九載考最遷戶部員外郎郎中贈其父道明員外郎封母

周氏為太宜人並受誥命其所領司最劇書簿立辦時貴
戚方盛有所干請力為摧抑尚書李公敏薦為光祿寺少
卿意氣勃發遽罹猜忌會考覈京朝官以浮躁淺露例調
知山西之忻州忻若所嘗奉使地不欲往上疏乞致仕再
上未允復疏曰郡縣之職非循良豈弟者弗稱茲以浮躁
淺露之名而責其循良豈弟之政蓋亦難矣既得請榜
於坐曰五斗懶將雙膝屈三章乞得一身間論者賞其
志亦惜其才之不盡見也君舊居城南徙禁籞之西偏

已乃復故業間歸沛置屋數楹歲取僦直忽燬於火又無他貿易歲費且不給持以勤儉未嘗見言面喜讀道書手自抄錄至盈箱篋或訝之笑而弗答與客觴詠投壺象戲或雜以諧謔文采逸發獨不及官府事予叩之琅琅可聽使得再試未必不斬然穎脫也今天子登極詔進階朝列大夫至是卒嘗為友索草書久弗致纘未屬三日以幅楮抵予必得乃已交接之際蓋至死不易

云銘曰

少而同袍壯而同朝分官異曹獨老於韜豈才弗能實命不遭觴子於堂弔子於郊銘以葬之以全我交

贈淑人孫母錢氏墓誌銘

戶部尚書孫君志同之父之喪予嘗為作銘及母錢氏
墓銘弗及備意有所待也越十有九年自述行狀二千
言以請予讀既歎曰世所述先德有能詳且實若是者
乎按錢氏出鎮江丹徒祖忠謫戍湖廣始居安陸與孫
同里閈父廣於素菴翁雅厚遂許聘其子資政公孟恕

逮事舅姑並致孝敬體素弱始不習勞間姑戒躬率婢使至窮日夜舅老病嗽晨起須茗飲淑人每夙興製茗姑喜肉炙躬執炊爨暑必近火自始嫁至垂老饗饋如一日親處以舅姑在不敢過哀私居縞素定省必易服從事公性嚴肅雖細事必稟而後行有所怒則為寬解家法不置乳母生五子六女皆自抱負紉綴至得婦乃已素好潔祭饗器必自滌每澣綺葛立夏日中以手熨抑俾燥濕得所用不珍物衣雖久不垢敝裁剪繒錦不

遺餘質積至數千片輦合補葺五色間錯粲然成文公弟妹七人處以和撓不失辭色外睦兄姊孤且貧者遇之尤厚以暨諸姻戚皆然鄰婦死無棺假以佳木鄉黨患難亦周之以成公志公嘗謂曰吾婚嫁粗畢夫婦當偕老脫我得多筭則願分以益汝無相先後錢少公一歲後一年卒皆壽六十有一錢始封娶人進宜人贈恭人淑人至夫人而公亦加贈如志同官資政者尚書階也戶部以郎中歸省而公喪在弘治甲寅歲踰年而夫

人亦卒是為乙卯正月十有一日十有二月二十有九
日合葬雞籠山之墓異棺同槨乃戶部所親製以義起
者蓋於是寡遺憾焉嗟夫女德不外見若戶部之孝且
文能自紀述則雖聲歎跬步之細皆身教也由是叙銘
之以與父德並傳顧不可哉銘曰

有子如此無問其母以柔濟剛惟嚴教之輔惟德是似
質固其有有潛弗彰澤固能久惟枯樷在口若書在手
同堂合壙終獲其所我銘封石若篤其後

懷麓堂集卷八十九

欽定四庫全書薈要卷一萬六千七百十九集部

懷麓堂集卷九十

明 李東陽 撰

文後稿三十

誌銘

明故太常寺卿致仕進階榮祿大夫林公墓誌

銘

內閣置中書舍人領制誥詔勅冊寶奏疏封草書篆之

事地清職秘其貴者乃至三品顧不恒得若林公以成
累官太常寺卿加正二品祿進階資善大夫致仕會今
天子登極恭上兩宮尊號恩再進階從一品為榮祿大
夫蓋歷事四朝五十餘年年八十有一而卒遭際之盛
僅一再見而已公諱章以成字也世為杭之錢塘人曾
祖居義以上皆不顯祖仲英考森皆以公貴贈諫議大
夫太常寺卿祖妣鍾氏母張氏皆贈封淑人公幼而敏
悟藩司以大書薦於朝景泰初授中書舍人遂直內閣

與衡陽謝伯寬並價遷禮部儀制員外郎天順初文薄
叢書會有大典禮事出倉猝方稽據故實公預具籍冊
無所遺失李文達公殊愛之超遷禮部儀制員外郎成
化二年九載秩滿遷山東布政司左叅議寄祿順天府
朝謁仕事皆如故三年預修英廟實錄成擢太常寺少
卿十二年秩再滿進為卿以父喪服闋弘治初秩又滿
始有加祿之命四年憲廟實錄成時資勞愈積而限於
格例於是祿再加而官不復進中間若大明一統志續

通鑑綱目諸纂述事必預預必有賜金幣楮錠酒饌及
諸時物多至不可數後以母喪服闋遂上疏請老始有
進階之命顧以二子皆仕就養居京師累閱歲於是階
亦再進衣鶴腰玉以歸歸未幾而卒公孝妣及妻之喪
皆賜葬祭并其生所置墳皆出異數蓋雖曾省卿佐苟
非稱事應例亦有終其身而不得者斯亦可謂難已公
生於宣德五年十二月卒於正德五年二月二
十二日是年某月某日啟壙合葬其地曰金鍾山之陽

公素孝謹親疾必願天請代母老迎養於官每公暇不去左右友弟睦族急人患難其居官慎重不洩非疾病未嘗一日不入朝書法遒勁尤精鑒賞博聞習見能道先朝臺閣事歷歷可聽云乃為銘銘曰

錢塘之墟山水環磚鐘奇結秀造物有作匪物之作人亦孔卓或以行舉言揚藝擢公生其間自見頭角貌體而茂骨清以確如嵩斯松如嶼斯鶴既梁既桷瀕仰臺閣不簪不繳往返林壑斯人斯丘永以終樂

封阜國太夫人王母段氏合葬墓誌銘

正德庚午十一月十二日王母阜國太夫人卒上震悼
遣中官致香幣楮鏹奠於城東賜第命禮部諭祭者十
有四工部給米布諸物治凡葬事皆如制慈聖康壽太
皇太后哀痛不自勝慈壽皇后暨中宮皆有奠贈使者
道相屬勲戚公卿以下咸往弔其諸子卜以辛未二
月二十一日啟都城西玉河鄉阜國公墳而合葬焉乃
奉吏部右侍郎兼翰林學士靳君充道狀請予銘按狀

太夫人姓段氏世為南京望族實誕我太皇太后憲宗
皇帝既登極正位中宮公官於京師累封榮祿大夫後
軍都督府右都督於是又有夫人之命後長子源封瑞安
伯進為侯太夫人始加今封太皇太后在孝宗皇帝朝
已進重闈太夫人恩禮加厚每入宮輒留養踰月其家
居子姓甥婿歲時燕會蟒衣玉帶以次上壽太夫人春
秋雖高而聰明康健一一為之盡觴無不意滿一時大
家鉅室稱福壽者莫之敢望太夫人懷謙抱和貴不忘

勤富不忘儉一錢尺帛不忍輕費每旦焚香禱家廟教
子孫習詩禮親書史接賢大夫士夜則帥諸婦治女紅
或漏下數刻乃已臨終忽呼家人取舊賜蟒衣服之既
又麾之曰是非送終服也蓋其年至八十有九而耿耿
不亂如此可謂賢矣於戲我國家以仁孝治天下推恩
睦族施於外戚必仰體慈志厚於所生自孝廟以來暨
今上皇帝率用是道若王氏兄弟並躋五爵官封祿養
極庭闈之奉而敦詩說禮屏奢去傲滿而不溢君臣交

盡自昔為難阜國之教固始自蒙養而順守終善以延於無窮者謂非太夫人之訓不可也銘曰

翼翼舊都大江之東巍巍聖母靈秀是鍾匪惟國禎家慶則有天實屬之亦假其手桓桓阜國家始用昌溫溫夫人不顯其光德稟純和氣分清淑儲休召祥亦孔之篤椒房之馨奕葉沾沾封誥煌煌甲第潭潭衣有命服賜有玉食四十七年靡間朝夕先帝至孝今皇至仁老老之義由親逮尊生有寵章沒有虧卽從夫而終永奠幽室

明故榮祿大夫後軍都督府都督同知郭公墓

誌銘

都督郭公彥和世出武胄雅好文事厥妣朱太夫人暨
厥配李夫人之葬皆徵予銘比公卒厥子琮復以治命
請且奉戶部侍郎喬希大狀予於公以朱氏故有嫋好
知之為詳有與狀互發者乃叙其事以為銘公諱鉉彥
和字也初嗣指揮使住彭城衛成化乙酉以廣西荔浦
功進都指揮僉事己丑中武舉進同知月加俸二石贊

畫團營方畧掌旗鼓號令名遂起丁酉領五軍營右哨
戊戌備倭揚州諸府政尚鎮靜海道以寧丙午充漕運
叅將弘治戊申寄祿錦衣衛壬子充副總兵鎮廣西永
安諸路獮賊流劫府江公首議用兵分路進剿俘斬甚
衆乙卯進署後軍都督府都督僉事佩漕運印充總兵
官鎮淮安以廣西功實授俄復進都督同知降勅獎勵
賜白金綵幣給誥命階榮祿大夫自復入淮熟練漕政
悉官兵利病條貫便不便曲為區畫借京倉銀為般剝

費以代市息浚通州官河二十餘里置減水壩用淺船
般運以代陸輓歲各省數萬緡故雖專且久而官士愛
戴不少替正德丁卯召還京師奉朝請佐理都督府事
踰年乃卒昔人以轉輸功上戰伐謂兵食必相須乃克
有濟公先兵後食歷試皆效其所謂食雖非赴急應變
然持恒保大為國家遠久計功實倍焉而論者猶歎其
弗克盡用以沒此其人亦可知已公事母孝謹迎養嶺
南擣鼓之暇不廢定省自奉簡約雅好慕士大夫下上

論議圍碁雅歌閱古書名畫蕭然如書生云公生某卒
某葬某謹為之銘曰

東巡海徼窮三吳南盡百越踰蒼梧左節右鉞麾且驅
但有號令無喧呼執俘獻馘多壯圖江淮之間財賦區
億兵兆粟萬舳艤前參後帥紛卒徒茨染蠶地相擇扶
論功校績已有餘豈以旦夕爭錙銖古稱宅相事有諸
平陰之澤世不渝承家有子讀父書刻石紀德昭謀謨
堂封合葬如來胥公生全歸死不孤彼不死者歸來乎

卷之十一
句容知縣劉生德機墓誌銘

有傳劉生德機病者予曰德機質厚不宜病又有傳其死者予曰德機器局甚偉不宜死既乃於喬侍郎希大得邃菴楊先生報哭曰噫真死矣蓋德機以內弟學於予又學於邃菴邃菴以都御史致政居鎮江德機實在鄰壤得氣疾劇往就醫忽病瘍卒於丁卯橋別業邃菴為制棺斂為文祭之甚哀越數月喪至西郊葬於四里原世墓劉氏出順天之順義世居京師有名籍德機諱

劉德機其字少從父至新昌歸父喪哭至嘔血為京學
生試久不售成化丙午予主考京闈德機聞命即引嫌
不就試弘治乙卯乃得舉又詘禮部已未予再莅春試
復不就又三試皆北謁選吏部乃得知句容縣則正德
戊辰也會歲大侵徭稅杳至詢民疾苦極力撫慰每京
府牒下曲為申告至擢督責不少變民恃以為命爭相
慕悅道路騰播流聞京師部使者察其能致旌勞焉蓋
自為諸生三十年始得一命既壯長益練習世故所

試輒效使假以時歲當大有所就而不意其遽止也悲夫德機每見予所為文雖寸紙隻字不輕棄擲今其死雖不吾屬吾知其待予銘以瞑也銘曰

由豐而約志若可樂在仕而憂維民之瘼胡負之卓卓其成落落其施未博咎豈在學彼不死者惟文章是託我銘劉生以慰冥漠

亡女衍聖公宗婦墓誌銘

嗚呼吾女其竟至此極也吾女年十八嫁於孔氏嫁十

有一年比歸寧已病纔兩月遽沒於此痛哉吾家故多難繼娶於贈太師成國莊簡公之女今封一品夫人朱氏生二女及一子兆同皆夭惟吾女一人吾女眉目清湛翛然玉立意其非凡兒匹諸貴家多議婚盡却之弘治丙辰前行聖公南溪先生有子聞韶方冠屬其弟衍聖公東莊先生來議於京陳都憲玉娶於孔氏與二公通家又視予為知己首為請曰是宣聖六十二代大宗子也簡雅而文予謂族大非耦且以遠故未應太宰屠

公朝宗輩十人懇予不置予要以三事曰吾女尚幼必
三年後成禮禮必從儉孔氏子必令讀書皆應曰如約
乃許之庚申東莊以聞韶至納徵之日少師守靜焦公
實相禮焉吾女素孝謹戀不忍別其兄兆先憐而送之
既至奉舅姑食必親饋繼嫡姑袁夫人暨其姑江夫人
奇愛之東莊卒聞韶既襲公爵而南溪又卒吾女居喪
哀毀屏服飾相祀勤恪處諸妯娌和遜有節接婿戚無
驕色婢僕數千指馭之皆有恩端居一室雖名園別墅

未嘗一至屢娠弗字自置媵妾人以為難比字一男輒不育其得疾亦以此恒念違遠父母泣涕無虛日或慰之曰夫人為聖門宗婦爵重族盛宜莫與比復何憾吾女曰貴富非不敢望但獲恒侍膝下死不瞑矣雖百方解之不能得甲子重建闕里廟成予奉勅代祀畱其家十餘日乃返其母亦嘗還之還後愈益戀慕比歸雖病強笑語慰予及卒吾母麻太夫人哭之甚哀有歲制棺輒以予之殯斂皆如禮時聞韶適有疾請暫寓京療治

上命醫診視遣中使賜酒肉蔬菜物及以枣告請再假數日上為憫惻復特遣禮部官祭於殯行人祭於家仍給驛護枣令有司治葬事吾女未給封誥而得此蓋異數也吾女性朗慧其母口授女孝經及名物之書意領頡答皆畧能默記手寫家信作蠅頭字或為韻語多思歸之詞聞者悲之念凡之孤女手製衣裳歲再三致至買女婢給之其歸寧凡七至屬縗之際父母及夫皆在焉蓋其恩誼篤至若亦有陰相默會者獨念其二姑弗

獲終養為終身恨嗚呼痛哉吾女年二十八生成化某
年卒某年葬於孔林南溪墓之右銘曰

孔氏世爵為大宗子亦有宗婦式相廟祀代六十二婦
氏維李巖巖闕里生則歸之鬱鬱孔林死則棲之歸獲
其配棲得其所女靈在茲永奠終古

明故資政大夫太子少保禮部尚書兼翰林院
學士贈太子太保謚文裕白公墓誌銘

國朝父子官至尚書者不過數人南宮白公其一也公

諱鉞字秉德考諱圭舉正統壬戌進士官至資政大夫
太子少保兵部尚書贈榮祿大夫少傅謚恭敏恭敏公
之為浙江布政也公生於杭成化庚子舉京闈第一甲
辰舉禮部廷試第二人及第授翰林院編修弘治戊申
同修憲廟實錄以內艱去癸丑同考禮部丙辰秩滿還
侍讀己未充經筵講官壬戌復同考禮部今上在春官
充講讀官癸丑修大明會典成進侍講學士賜宴禮部
尋修歷代通鑑纂要公亦與焉甲子考南畿鄉試乙丑

以登極恩進學士加從四品充日講官丙寅開經筵賜
白金綵幣車駕視太學賜坐彝倫堂丁卯命教庶吉士
署掌院事擢禮部右侍郎日講如故尋改吏部遷左侍
郎賜御製蟠龍諸詩賜纂要進尚書己巳賜玉帶庚午
復命兼學士入內閣專典誥勅掌詹事府事以寧夏平
賜賀功金牌加太子少保居月餘以疾卒年五十有七
上悼惜不置贈太子太保謚文裕遣官諭祭勅有司治
葬事公以公卿子習聞朝廷典故加之問學博涉強記

詞翰清美見稱於時而久職文字典禮無甲兵錢穀之寄故以此終其身成其所為名其為人重厚政尚寬簡不為骯髒之行瑣屑之節值所難處寧稍為遜避而未嘗遂失乎正其居家惇孝養與其兄錦衣千戶鏞弟國子生銓及銳鈁相友愛遇端戚有恩上下交際不為諂諛有長厚之風焉其所著有怡靖稿若干卷公以某年月生某日卒辛未某日葬於南宮某原予與公同官久矣乃為銘銘曰

世紹科第家為公卿我自得之匪祿麤是膺兄翹弟華
業擅文武我以文試匪甲胄為伍士則有學惟經史子
曰我所以仕固其在此官則有職惟天地人曰帝有命
我曷敢弗寅進敷講帷入掌綸誥凡所施用皆文之教
禮有賜葬行有易名一之為難矧不忝厥生父曰恭敏
子曰文裕惟千百襍以永終譽

封武定侯夫人郭母柏氏墓誌銘

武定侯郭公諱良既卒之四年當正德辛未三月二十

四日夫人柏氏繼卒其子嗣武定侯勛以喪告且乞假襄
事上遣禮部官諭祭令有司啓墳合葬於是卜以五月十
一日窆焉嗣侯乃告於予曰先公之喪辱惠之銘茲吾母
不敢他請乃據以銘柏氏為保定蠡縣望族純懿有內則
父母慎擇配久之得武定公公喪父當嗣以年幼例給侯
祿優養於家比長族人有爭襲者撓之遂罷侯封廼始授
指揮僉事祿不足夫人輒以奩具佐之恨不逮舅養事太
夫人許氏備極孝敬食必甘旨衣必輕毳務得其歡乃已

暨諸族鄙雖幼且賤亦施禮遇未嘗以貴盛加人公素好
容夫人每見意治具不俟咄嗟而辦公亦以是麥名弘治
癸丑公被簡莅衛事親交咸賀夫人獨曰祖爵未嗣憂方
大耳丙辰公勘獄湖南夫人脫簪珥以充行橐公曰官有
廩餼安用此夫人曰君素不妄取獨不為意外計乎辛酉
許太夫人請於朝下廷臣議謂榮國公之功不可忘公乃
得襲并給封誥夫人曰為郭氏婦勤苦三十年而得此死
不恨矣甲子公奉命統京營兵捕近畿劇盜所謂靠山王

者獲其黨數十人夫人曰玉石俱焚自古難免人命至重未可忽也夫以女婦而能為此言顧不難哉銘曰

武胄之貴惟勲與戚一之既希矧可兼得郭自開國為公為侯世嫋帝家貴鮮與儔亦有嘉儻出於戚里內和外肅是謂媲美晨滌暮甘中有家饋春蘋秋蘩上有廟祭子職是共亦惟婦賢世有恒道貴家所難生本從夫亦從其死其從不死亦既有子我銘君侯亦銘夫人公有家傳系以斯文

翰林院侍讀學士徐君舜和墓誌銘

嗟乎舜和已矣舜和才甚敏氣勃勃不少降骨堅聳而
神若有餘皆不宜死而竟至此也舜和姓徐氏諱穆舜
和字也世為吉安吉水望族幼時日記數千言十歲受
易學十八廩食為縣學生十九舉江西鄉試第二入國
學已有名弘治癸丑予考禮部得其文奇之賜進士第
二授編修嘗以親老引疾歸再聞歲己未同考禮部得
一卷予時再出典試事力主之以寘榜首遂魁大對乃

今諭德倫伯疇也癸亥秩滿遷侍讀與修歷代通鑑纂
要宋元論斷多其手出乙丑復為同考得今編修董文
玉為首暨諸名士尤多今天子嗣位命充正使賜麒麟
服頒正朔於朝鮮及境譯告國王不郊候迎詔不遵跪
舜和援古義稽今制反復辯析皆如議王屢遣陪臣代
質疑義剖析不遺凡所餽獻悉拒弗納其人皆愧服不
置焉與修孝廟實錄撰述必當充經筵講官敷說有體
戊辰以外艱歸時逆瑾扇虐惡諸翰林不為禮屈間舜

和才諷以顯職不為應比書成例進秩恠不肯或嗾之謂文士不習世故擿所同忌者十餘人陞調諸部屬俾擴充政務舜和雖憂居猶不免得南京禮部員外郎庚午閱服未至改南京兵部瑾既敗諫官以為言請復舊制舜和始復為侍讀今年命清理武官黃籍會肺病未差力疾入治事旋復大作比內閣以翰林春坊多闕員乃疏其有資望者請以次陞補舜和名在疏中報至歎曰命也翼日遽卒其子永年請於朝下吏部謂已得允

命且疏其次所當得特予為侍讀學士亦異數也舜和事親孝與其兄順美友而恭性不喜殺間哀鳴聲輒不食至所交際乃骯髒不下博極羣籍於凡國朝故實兵民利弊四方地里險易俗尚之薄厚以至人情物態常變真偽不同之故若指諸掌公堂廣坐言議英發畧無諱避顧非其人則噤不出一語語必悔之其所自負挾奮欲一試而幾會屢失久而不振然其退其進名義甚正校其所自得亦已多矣為詩文雅贍有思致不蹈畦

遷人以為難有南峰稿若干卷舜和生成化戊子正月
九日卒以正德辛未五月十一日卜以某年月日葬某
山之原舜和之葬父也嘗徵予銘茲且葬永年揣其志
若非予文不瞑者實介倫董二君及易檢討欽之以請
乃誌其性行履歷而系以銘銘曰

躍之鏗然鑄之凝然擊之錚然噫是何聲也一試而缺
兮再試而折兮倏爾而沒兮名之曰干將終不可滅兮

國子生潘元謹墓誌銘

國子生潘君元謹者鶴溪先生之子吾友南屏太史之族弟也年四十有一而卒先生傷之手書界南屏以屬於予曰吾子不顯且弗壽若葬而無銘其何恃以瞑予嘗一再見元謹亦聞而悲之乃按南屏狀為銘元謹諱實元謹其字生而沈靜不外露言若不能出口服食儉素絕不為時好補景寧縣學生早得家學試有司屢弗利先生自進士累官知興化府致仕家居元謹禮侍色養代理家政無外內鉅細舉就條繙睦姻厚族尤重祠

墓歲必修葺凡先生義所欲舉方有指授則已辦矣先生晚益韜戢卜居山中去家數里許元謹日一往見先生固止之乃增拓堂宇以娛適其心自是喜懼文集日不去左右比以年當貢戀不忍別先生曰此汝身事且吾幸健毋效兒女子戚戚為也乃行廷考既當赴南雍道清河得疾至揚州卒於興教寺之邸正德戊辰七月某日也葬某山原元謹好周人急訓導黃某得危疾為視湯藥比死經紀殯斂資其喪以歸邑人有被誣為礦

盜者將竄入他郡亦為白之俾得復業有族子為鄰邑人毆死其人以賂求免拒弗納論者謂其得父風槩使得沾一命必能濟物而竟止此惜哉銘曰

身以親仕志豈在祿親實命我我其敢弗勗籍既登矣名既升矣將歸寧矣吁其亡矣既教之仕復望其止其亡不死亦既曰有子所慰親者庶其在此

明故太保保國公墓誌銘

正德辛未八月二十日太保保國公卒上聞而悼之特

贈太傅遣中官賜寶鏹二萬緝命戶部給米五十石布
亦如之禮部諭祭者十有四工部給棺槨凡葬事皆如
禮制其子麒將葬於昌平北澤山世墓卜以某年月日
從事奉陝西按察副使聶君瑄狀來請銘按狀公姓朱
氏諱暉字東陽其先河南夏邑人也考諱永嗣伯爵威
望著聞前後八佩印征荆襄延綏建州諸賊累功陞撫
寧侯遂進封保國公賜號奉天翊衛推誠宣力佐理武
臣特進光祿大夫右柱國太師兼太子太師追封宣平

王謐武毅三代皆追封為公弘治壬子公以胄子授錦
衣勲衛弘治丙辰嗣公爵已未命統神機五千營兵馬
庚申孝廟簡黜京營提督官兵部會薦可代者以公名
上上親御便殿召內閣臣面議親書手勅命總三千營
兼掌右軍都督府事辛酉命持節冊充榮王妃納徵正
使是歲敵犯延綏命佩征苗大將軍印總諸路兵討之
深入河套擣其巢會夜大霧苗遽驚遁獲舊勅二道及
兵器牛馬諸物斬首三級別部兵亦斬首百餘以捷聞

上降勅獎勵班師之日值當升殿特御奉天門見之壬
戌閱視京營官癸亥命提督十二營仍兼總三千營事
甲子孝肅太皇太后崩命督治山陵及別建饗廟會以
災變辭優詔弗許復佩印出勦宣府大同邊寇亦有斬
獲還入居庸關上遣中官以牛酒犒軍賞賚甚厚尋加
太保今天子即阼命侍經筵充正使行皇后納徵禮其
所奉命若代祀郊廟社稷山川諸神其所受賜若蟒衣
玉帶繡春刀皆出常格而金幣寶鏹食飲之類弗計也

戊辰以疾告公具疏乞致乃許焉益再閱歲乃卒距其
生正統戊辰正月十一日年六十有四公長身美髯器
宇凝重寡言笑人莫測其蘊性素孝謹武毅享爵久公
已逾五十出侍賓客猶執子弟禮凡韜畧紀律戰陳之
事多所聞習嗣爵僅三載即登大帥屢授節鉞敬歷中
外諳練日深更化之初方隆用舊而公竟弗起矣銘曰
惟國有爵維公暨侯伯乃其亞實超品流公父嗣伯為
侯為公公嗣厥封允惟父風虬髯長軀公有奇骨內掌

營伍外總節鉞河曲之墟莽為敵區公擣其虛靡堅弗
驅凱還于朝意氣增重端居廟堂武偃弗用勳名始終
亦孔之難皇實命之其歸則天高門巍峩下有駟馬簪
纓蟬聯請視來者


欽定四庫全書

卷

卷九十一

懷麓堂集卷九十





總校官庶吉士臣張能照
校對官庶吉士臣嚴福
謄錄監生臣顧振

欽定四庫全書叢要

集部

懷麓堂集卷九十二



詳校官僕補通政司經歷臣郭祚熾

欽定四庫全書

薈要卷一萬六千七百二十

集部

懷麓堂集卷九十一

明 李東陽 撰

續稿一

南行稿

留別京中諸友

近奉絲綸出九天遠從闔閨望羣仙雲霄別路八千里
江漢歸心二十年舊壠松楸還楚地故人詩話滿吳船

微官未敢輕離思不待秋風櫂已旋

張家灣旅宿用潘時用韻却寄一首

閉戶端居長抱癖乘舟南去欲登仙壯年俛首惟長劍
舊事傷心為別船杳杳關河勞夢寐匆匆杯酒各風烟
情將弱柳春無賴意入停雲暮已傳萬里江山名勝地
百年心事遠遊篇清溪短櫂催將發旅館初燈試不眠
路隔紅塵燕市境望窮青草洞庭天雲開極浦西山出
露下高城北斗懸身在乾坤嗟獨健道存膠漆願終全

暫時分手君須記匹馬斜陽古寺前

舟發張灣宿河西務

蒼茫正合塵中眼縹緲真乘水上舟江月海雲疑是夢
畫圖詩卷坐消憂沙邊細浪隨鷗鳥樹裏青山入柁樓
行盡驛亭三百里五更風急住灘頭

楊村阻風

春風東來河水渾驚沙走石天地昏舟人喧呼怒濤湧
海若戰鬪羣龍奔前船咫尺不得上去路倉皇安可論

床欹几側坐未穩乘月夜過蒲溝村

直沽夜泊

二水斜通海孤村合抱城夜窓明月過春浦暗潮生憂國身將遠還家夢不驚留歡有親舊羈旅見真情

舟次奉新驛得戴侍御同年書知于前驛相待

漫得二絕

月出高樓生野烟斷堤踈柳驛門前美人只在雙塘外

海口潮來好放船

又

一櫂江南本舊期
宦途多事獨棲遲
東風幾度停舟意
惟有春潮日夜知

放船

月出風亦靜
卧聞雙橹鳴
起看林巒過
始知我舟行輕
鷗逆素浪
幽草迎人生
清暉散宿靄
遠日增春明
風帆疾於鳥
頗快青雲程
豈不惜行路
懷歸意先征
浮雲西北馳
默然傷我情

東南風

黃沙濁浪排長空
十日五日東南風
前船暫開後還却
闕岸回灣隨處泊
篙師有力不自持
回帆轉柁無停時
君不見大船安穩如屋裏
小船下上隨波起出門萬里
誰復知咫尺悲歡不相似
平生漫說行路難
行路之難乃如此
却笑悠悠陌上人兩脚踏地猶悲泣

宿流河驛遇寶慶謝太守

仰止懷先達相逢即舊知
別離曾有贈舟楫本無期
細

語春燈暗高歌暮角悲從君問前路江海得吾師

早發滄州

片帆輕舸發滄州野樹離離散不收兩地離心河上草
一燈殘夢渚西樓塵生曉市人烟集雲擁春城水氣浮
我欲憑高問歸雁瀟湘何處可維舟

清明二首

舊壠蕭蕭楚水頭每逢寒食憶松楸匆匆便作江南客
又是并州一種愁

又

原南草色動春晴
又是離家十日程
旋摘田蔬供野飯
晚風河上過清明

桑園阻風

離家凡十日
九日住風波
山色依蓬轉
灘聲雜樹多
晝
床無穩卧
夜劍且悲歌
不有承顏樂
其如羈思何

望德州

窮林蒼蒼一望平
落日始到德州城
山色離京不復見

河流到海無停聲邇人擊鼓朝暮急舟子刺船來往輕
與客相期隔素月停燈坐待東方明

泊故城與戴侍御謝寶慶夜酌喜而有作

逆流衝長風岸渚成百折舟行落日暝篙櫓力已竭同
袍烏臺彥待我心切切結交重然諾此道久已絕偶逢
賢太守論舊語不輟烏臺冰霜姿官好不自熱周旋共
觴酌燕坐齒為列相顧問起居停盃聽予說自從違京
邑道路屢危艱欹帆却擰駛長纜阻牽掣復聞南河水

淤淺不過轍黃沙捲驚塵千里地欲裂雨師何大懶風
伯無乃襄我舟未妨遲農事長苦缺懷耆問蒼天心亂
不可揜二公濟世者慷慨憂不歇峩峩南州蓋矯矯中
臺節方將承明威庶用掃氛孽許國同肝腸匡時仗豪傑
閒官愧升斗茲計予已拙且復盡君觴倉皇慰離別

泊武城姚尹顯求詩率爾有贈

寂寂離亭坐不眠偶從柱史識君賢劉蕡慷慨陳言日
宓子風流作縣年風雨繫船春樹底河橋分手夜燈前

武城千古絃歌意一度懷人一惆然

臨清二絕

十里人家兩岸分層樓高棟入清雲官船賈舶紛紛過
擊鼓鳴鑼處處聞

又

折岸驚流此地回濤聲日夜響春雷城中煙火千家集
江上帆檣萬斛來

浦橋得淺

落日荒村無犬聲風沙兩岸斷人行須為繫纜空林下
坐看前溪春水生

望東昌

水淺無登岸沙乾有短蓬河源還濟北民俗自齊東地
渴今春雨帆欹昨夜風蒼生不可問吾亦歎途窮

張秋

河流舊有患自古重隄防創始固不易居守乃其常昔
聞張秋水汎溢誰能當沙沉鐵磊砢石走波昂藏人言

徐都憲此功不可忘歷年既久遠衝急隨摧傷東山伐
木石西府派丁糧遙遙版築聲杳杳道路長由來重漕
運值此年歲荒居民勿嗟怨王事固靡遑金堤潰蟻穴
此戒良亦彰寄言後來者未可崇燕康

馬船行

南京馬船大如屋一舸能容三百斛高帆得勢疾若風
咫尺波濤萬牛足官家貨少私貨添南來載穀北載鹽
憑官附勢如火熱邏人津吏不敢詰爭狃聞捷防轉欺

脩去忽來誰復知乘時射利習成俗背面却笑他人癡
他
人雖癡貧亦樂明朝犯令爾輩縛官家號令時復傳
津吏如今更索錢

濟寧二絕

擾擾舟車此要衝地連淮北控山東龍王廟轉潺湲下
太白樓高睥睨通

又

濟水東來泗水連郡城深處有人烟湖心曉色平臨岸

閘口春濤穩下船

歌風臺

風急高城湧暮波
舊時臺榭此山阿
鹿當秦楚黃塵合
龍出芒碭紫氣多
海內英雄休戰伐
里中耆舊得經過
功成坐失蕭牆計
遺恨當年猛士歌

徐州洪

山根槎牙石挿水
蹲螭鬪虎隆隆起
胥濤鯨浪中崔巍
百步九折勢不回
歛如萬馬乘風來
奔雷跋電逐恍惚

夸父不得相追陪是時旱涸尚如此何況泛溢凌空頽
舟中徐人作齊語指畫喧呼若風雨一夫麾旗百人拒
瞬息風帆不知處南人懼笑北人懼予亦為之變雙監
吁嗟此險天下雄形勢恠詭誰能窮長流淤濁不盈丈
豈有神物藏其中但見巨石如蟠龍大書刻自東坡翁
筆力險絕如此洪似覺造化爭奇工我生好古來幸早
三月水落波濤空復聞百里有呂梁洪波巨石相昂藏
世間夷險無定所此地何獨非康莊人生一身須周防

百年行止思垂堂豈不愧彼千金郎嗚呼豈不愧彼千

金郎

白楊行

路經白楊河河水淺且渾居人蔽川下出沒無完裨俯首若有得昂然共騰歡停舟問何為蹙額向我言始知沙中蜋可代盤間食此物能幾何歲荒乃加繁吾人未溝壑生意諒斯存倉皇為朝夕豈不念丘園邊河種官柳一株費百錢茫茫江淮地千里惟荒田十歲九不雨

摧枯固其然况復苦迎送誅求到心肝生當要路衝雞
狗不得安嗟我獨何為聽之坐長歎微心不盈寸引此
萬慮端民風古有賦歷歷誰能宣悲哉白楊行觀者幸
勿刪

浦望

暝色投林久移舟更趣程遠烟生浦望斜月逐溪行漸
解殊方語偏增故國情萍踪何處定明日楚州城

過黃河

清口驛前初放船長淮東下水如弦勁催雙櫓渡河急
一夜狂風到海邊

夜過邵伯湖

蒼蒼霧連空冉冉月墮水飄飄雙鬢風恍惚無定止輕
帆不用檝驚浪長在耳江湖日浩蕩行役方未已羈棲
正愁絕况乃中夜起

揚子灣

揚州久枯旱河水縮不流千夫力未強曳繩用巨牛漕

州百萬斛擁塞如山丘將軍令不行軍士蹙額愁躋攀
不可上安能問歸舟民船及賈舶瑣瑣不足籌誰為水
車計轉汲春江頭微涓注巨壑豈足裨洪流須知此天
意亦得衆人謀坐視固非策煩驅轉為仇亢陽必終復
理數亦可求庶幾沛甘雨洗我蒼生憂

揚州懷古

日出蕪城曉望空萬家樓閣水烟通地當楚越帆檣動
鎮壓江淮枕臂雄民物盛朝還禹貢亂離前代說隋宮

瓊花觀裏花無數寂寞荒臺野草中

揚州與戴呂二侍御同觀八仙花有作留察院
春風不見廣陵花忽到行臺御史家九曲闌干隨月轉
兩行環珮倚空斜品題自稱仙為骨搖落誰知歲有華
莫遣風霜浪摧折高秋須待楚江槎

風江野泊偶步江上無主竹園呼酒招戴侍御
謝寶慶彭民望同飲

江上人家柳繞牆更多脩竹傍林塘不教野老知名姓

且共樽前一度狂

江上望金陵

海雲浮動碧雀嵬渺渺孤帆望雨開吳楚青山從此斷
東南王氣渡江來龍盤却作千年樹鳳去空餘百尺臺
而我獨慚觀國士兩都猶數孟堅才

南京謁孝陵有述

禮樂千年會征誅四海空商周終愧德唐漢敢論功鳳
歷歸真統山龍繞舊宮秋風霸陵樹落日鼎湖弓萬國

謳歌在餘生覆載中小臣瞻拜地江漢亦朝東

登報恩寺塔

古磴穿雲到石牕樓臺四面隱旌幢北臨廣路斜通郭
西隔平原俯見江萬里乾坤踪跡半百年風雨鬢毛雙
向來作賦軀全瘦獨有凌雲意未降

登雨花臺

臺高欲上雨濛濛虎踞龍盤在眼中萬古青山還白下
一丘黃壤自江東謝公著屐何曾到梁武談經亦已空

好是五陵歌酒地年年芳草坐春風

遊靈應觀

珠宮不見潭底日碧澗俯通林外渠市上人稀午烟靜
山中草生春雨餘仙翁丈室煮清茗溪叟尺盤束白魚
縹渺雲樓不可上吾當駕鶴凌空虛

遊雞鳴寺

諸山盡是鍾山脈聞道鷄鳴更有靈岡勢斜分龍虎脊
巖光深閟鬼神扃風含落日松聲迥雨帶平城草色青

東郭吏人催上馬暮寒吹面酒初醒

采石登謫仙樓

江天日暮雨瀟瀟城邊野亭春寂寥浮雲東來蔽江色
明月墮地誰當招我懷古人坐不寐鯨背之子神仙標
風髻露鬟事恍惚豈有赤脚凌青霄舉杯問天天不語
予亦沈吟俯江渚縱有神仙亦妬才不然豈謫來中土
昭陽殿前牝雞午老鳳低飛入簾戶網羅橫空鏽其羽
雌雌和鳴竟何補燕雀之輩安足數平生豪氣隘九區

寸地未可容公軀有才如此不得意自古非一誰當吁
杜陵野老憐才客思君不負青山色千古波濤百丈深
至今猶恐蛟龍得英雄一去俱陳迹楚水吳山眼中碧
鳳去龍飛不復還仗劍悲歌竟何益

長江行

大江西來是何年奔流直下岷山巔長風一萬里吹破
鴻濛天天開地闢萬物茁五嶽四瀆皆森然帝遣長江
作南瀆直與天地相周旋是時共工怒觸天柱折遂使

后土東南偏女媧補天不補地山崩谷罅漏百川有崇
之叟狂而顛坐看萬國赤子淪深淵帝赫怒罰乃罪神
禹來乘四載驅大章走堅亥黃龍夾舟穩不驚直送馳
波到東海朝離巴峽暮洞庭九派却轉潯陽城繫行南
徐萬餘里更萬餘里通蓬瀛君不見黃河之水天下上
其大如股空縱橫長淮清濟出中境曷敢南向爭權衡
千流萬派瑣瑣不足數雖有吐納無虧盈下亘厚地上
摩高空日月出沒蛟龍所宮奇形異態不可以物象但

見變化無終窮或如重胎抱混沌或如灝氣開穹窿或
如織女抱素練或如天馬馳風驥空山怒哮飽後虎巨
壑下飲渴死虹或如軒轅鑄九鼎大冶鼓動洪鑪風或
如夸父逐三足曳杖狂走無西東或如甲兵宵馳聚嘯
滿山谷或如神鬼晝露萬象出入虛無中吁嗟乎長江
胡為若茲雄人不識無乃造化之奇功天開九州十有
二山南北並峙江流其間堯舜都冀方三苗尚為頑魏
帝倚天歎征吳但空還吁嗟乎長江其險不可攀古來

英雄必南駕我祖開基自江渡古來建國惟中原我京
坐制東南藩始知天險不足恃惟有聖德可以通乾坤
長江來自西極色人寰環帝宅我來何為為觀國汎吳
濤航楚澤笑張騫悲祖逖壯神功歌至德聖德浩蕩如
江波千秋萬歲同山河而我無才竟若何聊為擊節長
江歌

小孤山

山當極浦峰全峻江到寒磯勢却迴獨立木門風不斷

片帆揮手謝高臺

與謝寶慶擬登匡山至九江阻雨和韻

瀑布懸青壁香爐出紫林謫仙千古句謝眺一生心野
樹連天暝春江拍岸深我來茲郡晚風雨罷登臨

江南雨和寶慶韻

地濕蛇蟲聚山深草樹多野雲通晦朔春雨亂江沱
薊北無全麥關西有荷戈此時枯槁甚相望隔懸河

呼風謠

江南舟子能呼風呼西即西東即東羣咻遙嘯響徹谷
天風下來呼轉速船頭三老催呼急風來衆人皆起立
愚民習俗我所笑舟人相矜不殊調莫呼風人生順逆
由天公君看萬斛下江舸朝朝灘上呼風坐

江中怪石

突兀山城抱此州江間怪石擁戈矛隨波草樹愁生鱗
駭浪蛟龍却避流豈有岩堯能砥柱祇多衝折向行舟
憑誰一試君山手月落江平萬里秋

江雨次韻

四月雨溟溟長空瀉未停遠江深正白老樹濕能青蜃氣朝仍結龍宮夜不扃離人自無賴況是枕邊聽

曉發蘄州次韻

城曉遲吹角高雲濕未開驚波風不定危石岸將頽青入無窮草黃低欲墮梅江湖苦留滯遊宦恥凡材

道士洑夜泊次韻

野宿驚初定殘燈慘向明市船南北語邇舍短長更巖

轉陰風急江空夜雨鳴壯年輕別甚腸斷此時聲

回風磯

怪石崢嶸與岸平洑流驚浪劇縱橫向來頗狎江湖險
未覺回風浪得名

江上聞蛙

野曠天空月正明水田青草亂蛙鳴江頭十日瀟瀟雨
禁得離人此夜情

過黃州

江上兵回烈炬空都將成敗付東風千年赤壁無尋處

辛苦英雄一戰中

登武昌觀音閣

此地已多暑未登先怯寒逕危妨躡屐江激動凭欄渚
築因山易風帆失勢難漢陽深樹裏何處是長安

江上弈棋與寶慶

江上陳兵二壘同都將一笑定雌雄烏林得計周郎捷
淝水乘橋謝傅功蕉底夢回風雨散橋中人老歲年空

一枰斂盡斜陽色獨立青山在眼中

小君山

武昌西望楚江灣翠黛盈盈隔水看極目洞庭應不遠
舟人說是小君山

登岳陽新樓

突兀高樓正倚城洞庭春水坐來生三江到海風濤壯
萬木浮空島嶼輕吳楚乾坤天下句江湖廊廟古人情
中流或有蛟龍窟卧聽君山笛裏聲

謝寶慶洞庭圖湖中作

時謝公乞歸不得請將還治寶慶

湖南鉅郡推岳陽樓前大湖春水長周迴九江帶七澤
顛倒萬象隨三光洪濤巨浪拍山動風雨却灑炎天涼
君山遠在湖中央蒼梧不來斷人腸南尋汨羅不知處
屈子墮地魂茫茫謝公弔古心慷慨予亦從之渡沅湘
平生壯遊天地闊老大不覺鬚眉蒼商飈南來振南岳
孤棹未許還滄浪畫圖彷彿今皆是江海風期殊未忘
揮毫賦者誰最强前有應魁後孔賜二子之名滿天下

豪氣直欲隘八荒嗟予有辭不敢吐今人盡笑二子狂
眼中同眺似公少且復盡醉君山傍

江上聞蟋蟀

四月江天聞蟋蟀船窓夜短不勝長春蠶未了催秋織
世事相尋有底忙

至長沙送別謝寶慶

湘水天下碧衡山千古靈我侯東南來攬高濯其清此
地既佳麗斯人亦豪英五馬豈不貴棄之一羽輕茲謀

既不遂所志豈在名湖南近凋瘵歎息為蒼生近聞都
臺牒列縣須巡行贈君衡湘篇匪為遊冶情

與錢太守諸公遊岳麓寺四首席上作

衡岳地蟠三百里羣峯將斷復崔嵬巖間古刹依山轉
谷口晴雲滿樹來北海書存誰問價少陵詩罷獨憐才
扁舟已謝長江險又是匆匆一度回

又

路轉村回一掌平水田沙樹繞溪行居人尚說潭州守

書院猶存岳麓名荒蕪舊墓俱寂寞斷碑殘篆失分明
錢侯亦有招賢意潦倒無能作頌聲

又

危峯高瞰楚江干路在羊腸第幾盤萬樹松杉雙徑合
四山風雨一僧寒平沙淺草連天在落日孤城隔水看
薊北湘南俱在眼鷓鴣聲裏獨凭欄

又

政簡官閒訟亦消我公多暇得相招長沙地濕天將暑

岳麓山深路未遙歸磴淺留芳草屐離舟深繫木蘭橈
他年便作甘棠地白石青松漫寂寥

錢太守招遊開福寺不赴奉答一首

潭州城北楚江邊此地招提父老傳十里青山斜鳥外
滿庭芳草閑門前題詩自足騷人興愛客深知太守賢
多病屢慙招不起故園花柳為誰妍

燕長沙府席上作

郡庭開宴倒銀缸綺席珠簾玳瑁窓愧我辱軀真倚玉

看君雄飲欲吞江西陽影墮仍浮水南曲聲低屢變腔
旣醉不知豪已甚題詩那有筆如杠

燕長沙衛席上作

千里山川控帶通郡城高枕大江雄廣庭歌管今辰宴
好雨東南昨夜風朝組少年叨上客戎門高誼見諸公
明朝又是江樓別興在殘杯落照中

競渡謠

湖南人家重端午大船小船競官渡彩旗花鼓坐兩頭

齊唱船歌過江去叢牙亂槧疾若飛跳波濺浪濕人衣
須臾歡聲動地起人人爭道得標歸年年得標好門戶
舟人相驚復相妬兩舟睥睨疾若仇戕肌碎首不自謀
嚴訶力禁不得定不然相傳得瘟病家家買得巫在船
船船闘捷巫得錢屈原死後成遺事千載傳訛等兒戲
衆人皆樂我獨愁莫遣地下彭咸知

浮居戶

江南人家船為屋白髮長年水中宿生兒不識徒步勞

生女赤腳隨波濤江湖東西貨貴賤朝遊楚州暮吳縣
滿帆四面往復還慎勿恃爾凋朱顏江頭昨夜風浪惡
胡不歸來種田樂歸來無田生亦足

長沙竹枝歌十首

三十六灣灣對灣人家多住白茅間直過洞庭三百里
長沙城北是形關

又

南船北船滿洞庭蕭公祠前牲酒馨二妃枉作君王后

君看君山山自青

又

汨羅江頭春水生汨羅江上楚歌聲人間若解三閭苦
水底魚龍亦有情

又

馬殷宮前江水流定王臺下暮雲收有井猶名賈太傅
無人不祭李潭州

又

江頭彩旗耀日明船上鼓樂不停聲湖南樂事君記取

五月五日潭州城

又

潭州城邊多野田黃茅白葦遠連天莫言楚國無生理
畝地如今倍值錢

又

湘江女兒愁落暉湘江江上鷓鴣飛行人試看君山竹
竹不成斑君未歸

又

戎門旗節擁南臺軍士南邊戍未回紅巾小兒齊擊鼓
知是官船江上來

又

湘江水深天下清何如隴頭秋月明離人到此不得醉
况是高樓吹笛聲

又

長沙少年無奈春青衫白面不生塵勸君莫向湘潭住

江燕銜泥解涴人

長沙道中

風帆遡洪濤千里勢不歇暮登長沙岸始與大江別
夢魂猶洶湧行步方畿稟城南路逶迤十步九曲折重岡
互起伏老樹交斜結朝行惡蛇影夜蹠愁虎穴冥冥鬼
燐出杳杳人踪滅時維仲夏月行役遭苦熱嵐蒸毒霧
消日熇焦原爇葳蕤拂塵纓宛轉嘶汗驥招遙袂獨舉
示險旌先揭亭長憩息屢僕倦驅馳迭薪當野逕樵蓐

向招提設惟知朝復暮豈暇鋪與餕故墟亦孔邇旅挹
聊自悅遊南厭水陸憶坐換時節永懷千金戒幸免窮
途跌歸時寧憚遙吾當泛蘇浙

荷木坪二十韻

高祖處士
府君墓

恭言奉明詔祭告返鄉國路入茶溪深居人渺蕭瑟茲
坪我所志先壠舊封殖荷木生其旁松江瀉其北從戎
始北征家業隨蕩析吾祖懷故居臨終涕沾臆遺言在
孫子夙夜常警惕高秋下霜露展轉不安息還歸實父

命錫類荷君澤良臣展樽俎再拜掃榛棘縣令具牲醪
諸生走冠幘伯叔在我前子弟侍我側燎白薦馨香樹
碑紀名德安能耀泉冥庶用表里宅巢枝羈鳥性宦海
流萍迹古人重水木興豈在泉石眉山有遺恨頽水非
仁澤糾結勞寸心驅馳歎行役微官念靡盼戾止遑宴
息明發登長途徘徊更悽惻

雷公峽二十韻

族高祖提
舉府君墓

我家有遺譜云自洮州發茶陵世繁衍樹德為耕垡有

宋三百年歷元末衰歇公生實天挺少小負奇骨策試
登甲科詞林力不竭一官佐提舉踪跡遍吳越有母還
故鄉興言採薇蕨兵戈滿天地瞻拜阻宮闈避亂入永
新孤身任飄突希遂表微意志比蹈溟渤皇明始革命
蒐訪盡巢窟平生用世策垂老不自伐簪纓豈予事丘
壑成永沒大節幸不虧遺文為余闕提舉有青陽先生文集序行於世

尤多金石篇碑板勞剏劖卓爾稱鉅儒巍然聳高閣秋
風動雷峽孤塚高峯兀不才愧苗裔今日得參謁倉皇

問故地散亂訪遺碣有筆贊幽光茲言敢終訥

六月九日初度諸族父兄皆會感而有作

京國辭家萬里行故園今日暫逢生方言解共兒童說
孟酒能勞父老情地濕暑風清野樹夜深涼雨過山城
天涯異物還甘旨隨意樽前舞袖輕

得家書聞舍弟病二首

關山迢遞隔蒼茫忽報家書起欲狂猶恨匆匆語言少
應須一字九迴腸

生年嬌小最憐渠瘦骨稜層我不如別後逢人雙淚眼

疎燈細字若能書

茶陵竹枝歌十首

溪南溪北樹繁迴洞口桃花幾度開楓子鬼來天作雨

雲陽仙去水鳴雷

楊柳深深桑葉新田家兒女樂芳春剗羊擊豕禳瘟鬼

擊鼓焚香賽土神

銀燭金盃映綺堂呼兒擊鼓膾肥羊青衫黃帽挿花去

知是東家新婦郎

綠鬢荆釵雙髻螺青裙高係小紅鞚阿婆舊是茶城女
教得娃兒能楚歌

拍拍東風燕子寒卷簾花絮若為看夜深兩脚何曾睡
春水平于養鴨欄

儂餉蒸藜去插田勸郎休上販茶船郎在田中暮相見
郎乘船去是何年

春盡田家郎未歸小池涼雨試繕衣園桑綠罷蠶初熟

野麥青時雉始飛

白紙黃墳野草生柳烟榆火照清明楚城不識鞦韆戲
兩兩沙頭接臂行

山中閒煞採芳人

諸蘭汀芷不勝春極浦遙山豈解顰誰在長安殢花柳
溪上春流亂石多勸郎慎勿浪經過莫道茶城水清淺
年來平地亦風波

盈女生日

時其母亡一年矣

習笑應全解逢生也自懼長安閨裏月誰危倚闌干

過永新十八灘

禹跡何曾到多應閟草萊危灘天上下驚浪耳邊回野泊無時定船歌半夜催歛城不可住虺蜴暗徘徊

吉安府

山勢西來斷江流北去平萬家深樹裏聞是吉州城

聞揚州潮漲

五月金陵江水平揚州郭裏見潮生殊方消息逢人地

遠客悲歡此夜情即遣帆檣無阻滯莫教魚鼈太縱橫
漕州百萬東南計早晚元戎達上京

發南昌宿東湖口

落日豫章城歸帆第幾程草中南浦色樹裏北禽聲旅
宿依津處郵籤報客名東湖不可度風雨坐天明

滕王閣

舊閣淪於江今名西江第一樓云

滕王高閣罷雀嵬誰築西江第一臺雲雨不收歌舞地
文章空歎古今才豐城夜氣聞龍起彭蠡秋風見雁來

幾欲乘槎問牛斗不知平地有三台

水碓

村舂不自力杵臼清溪裏茲事予所聞經過親見此初觀未全解諦視得深旨長輪周其旁機括中齒齒急流相低昂日夜方未已蕩激勢則然設施固其理古人重制器法象隨所擬此物豈其餘末流弊宜爾雖多造作勞亦復天機使人言機害事抱甕者誰子剖斗折其衡吁嗟聖人死斯民至理足勤儉誠可喜觸事感我懷作

詩究終始

舟人有採蔬者問其名曰連理菜感而有作
汀人採芳至物好名亦好所恨舟中人不如沙中草青
草青于蘭秋風白露寒餘馨坐盈把三嗅不能食

弋陽雨晴

暑伏秋先至天陰日易低沙痕平草樹雨脚見虹霓席
坐攤書滿船更聽鼓齊葛溪三百里川路隔東西

廣信道中

旅泊逢初雁山城昨夜秋雨深南澗水風急上灘舟取
捷非無地垂堂且自謀江潮迂拙甚吾得及安流

過玉山

扁舟隨所適茲地復躋攀雨久未妨旱路窮方見山斷
橋人獨去高嶼鳥孤還東望臨安郡潺湲一水間

過子陵釣臺

嚴陵祠下揚帆處不見先生垂釣臺巨石倚空江葉下
冥鴻衝雨朔風回明時合重巢由節濟世非輕管葛才

莫道羊裘非隱物山川不礙去能來

過錢塘江

人道錢塘險高秋坐穩流地分吳越語山帶古今愁野
闊潮聲壯天晴海氣收誰家水犀手不射會稽仇

蔣宗誼府推期遊西湖為郭侍御所招不果

興在西湖淺水濱繫舟東郭問行頻南臺忽漫傳初簡
樽酒翻成愧故人蘿繞孤山諸逢合雨晴天竺數峯新
莫言行李倉皇甚猶是江湖汗漫身

西湖曲五首

湖波綠如剪美人照青眼一夜愁正深春風為吹淺

又

不信湖中好儂身別有家翻愁歲華盡不敢採蓮花

又

風落平沙稻霜垂別渚蓮西湖三百畝強半富兒田

又

草碧明沙際花紅試雨初官船盪素槧驚散一雙魚

又

莫唱西湖曲湖邊歌舞稀
儂家年少日遊冶誤芳菲

弔岳武辭

苦霧四塞悲風橫來義景縮地下沈萬葉坤輿外折鶻
足中頰大霆無聲枯蘖槁荄鐵騎騰突狼峰雀嵬龍困
沙漠鱗傷角摧齊仇九誓楚戶三懷姦相賣國忠臣受
猜積毀銷骨遺禍成胎命迫十使功垂兩淮盟城不耻
惜冠終諧重器同劇羣光共咍髮豎檀冠潮漂伍骸氣

奪羣醜殃流宋孩英雄已死大運成乘魂作唐厲形空
漢臺天不祚國人胡為哉壯士擊劍氣聲殷雷日落風
起山號海哀樹若可轉江為之回乾坤老矣歎息雄才

嘉杭道中四首

遠樹依稀極浦清溪宛轉長橋紅裙女子朝汲白髮村
翁暮樵

烟籠近浦沙白雨急長溪水渾一夜江頭潮滿釣船撐

到柴門

綠樹孤村水旁茅屋在水中央岐路寧知車馬生涯半是舟航

秋風燕子人家細雨漁翁釣槎日暮長安何處萋萋芳草天涯

風雨歎

吳江殊
舟中作

壬辰七月壬子日大風東來吹海溢崢嶸巨浪高比山
水底長鯨作人立愁雲壓地濕不翻六合慘澹迷乾坤
陰陽九道錯白黑烏兔不敢東西奔里人蒼黃神屢變

三十年前未曾見

正統甲子年

東鄰西舍喧呼遍牒書走報

州與縣山巒谷澗豺虎嗥萬木盡拔乘波濤洲沈島滅
無所逃頃刻性命輕鴻毛我方停舟在江臯披衣踞床
夜復晝忽掩青袍涕雙透舉頭觀天恐天漏此時憂國
况思家不覺紅顏坐凋瘦潼關以西兵氣多胡笳吹塵
塵滿河安得一洗空干戈不然獨破杜陵屋猶能不廢
嘯與歌世間萬事不得意天寒歲暮空蹉跎嗚呼奈爾

蒼生何

顧天爵送至舟中走筆有贈兼寄天錫

訪君周山廬送我具區浦留連未終日中道成間阻人
生萍蓬爾聚散靡定所安知瀟湘纜繫此滄江湖同袍
古人義倏忽棄如土感激聊共陳誰能問羈旅

蘇臺曲五首

秋水光於黛新粧愛日斜隔溪深不語孤櫂入菱花

又

草深香逕合花冷屢廊空惟有吳宮水春城四面通

又

樓臺春後掩環珮月中行莫上西門望寒潮昨夜生

又

國亡身亦虜却載五湖槎借問西施女何如張麗華

又

張王舊時宮零落數枝柳不是春風生芳菲誰能久

與趙夢麟諸人遊甘露寺

澗篠巖杉處處通野寒吹雨墮空濛垂藤路繞千年石

老鶴巢傾半夜風淮浦樹來江口斷金陵潮落海門空
聞書未報三邊捷萬里中原一望中

送方思訓之贛州

度嶺沿溪十日程半生心事此功名從今不作思家夢
月調風絃夜夜聲

遊金山寺

楚纜吳檣萬里還夢魂長在水雲間地當好景多逢寺
江到中流合有山鶲嶺高秋增突兀龍宮深夜鎖潺湲

謝公無限登臨興不為蒼生暫解顏

長向名山憶所逢偶來南國問仙踪潮聲夜落江心寺
雲氣朝浮海上峯玄浦樓臺通日月石壇風雨護蛟龍
詩成却笑張公子解道中流兩岸鐘

懷麓堂集卷九十一